

*Хайридин Султонов*

**ҚУЁШ  
БАРЧАГА  
БАРОБАР**

*Ҳикоялар*

*Тошкент  
Ғафур Гулом номидаги  
Адабиёт ва санъат нашириёти  
1980*

ББК 84Уз  
С 96

С 70303—26  
М352(04)—80 36—80 4702057020

© Faafur Fulom nomidagi Adabiёт ва sanъat nashriyёti, 1980 й.

## МИРКАРИМ ЧОЛ

Ҳар шанба шаҳардан уйга қайтарканман, бу кўчадан ўтишга юрагим безиллаб туради—муюлишдаги кекса садақайрағоч тагида ўтган-кетганга зимдан назар солиб, одатдаги дек, Миркарим бува ўтирган бўлади. Бирга келаётган ўртоқларим уни кўриб дарров ас-кия бошлишади:

—Ана, Ҳамид, ўтирибди бобогинанг, сенга кўзи тўрт бўл-э-э-б...

— Ҳамидга худо берди, деяверларинг, чолнинг авзойи бузуқ!

Уларга қўшилиб куламану, аммо гапнини очиши, юрагимнинг бир четига ғашликми, қўрқувми—алланарса тушди.

—Хўп, бўлмаса...

Болалар билан хайрлашдим. Уларга яхшида: нариги маҳаллада туришади. Ён кўчага бурилиб кетишаркан, тегажаклик қилиб ортимдан қичқиришди:

—Бўпти, Ҳамид, агар омон қолсанг кинога чиқ кечқурун...

Кулдим. Нима, чол мени ермиди? Емасликка емайдику-я, лекин Миркарим бува гапирса одамнинг жон-жонидан ўтказиб юборади: тили аччиқ. Қўпчиликка, айниқса, биз қишлоқ студентларига унинг ҳамма нарсага

суқулавериши, ортиқча насиҳатгүйлиги жуда-  
ям әқавермайди.

«Мундоқ бошқа чолларга ўхшаб, чойхона-  
да тинчгина ўтиrsa бўлмасмикан», деб қўя-  
миз баъзан нолиб.

Чолнинг қиёфасини кўрсангиз-кўрмасан-  
гиз, кинодаги Ялангтўшнинг ўзи дейсиз.  
Яқинда клубга шу фильм келган экан, чур-  
вақа болакайлар Миркарим чолга дарров  
«Ялангтўш бува», деб от қўйиб олишибди.  
Буни эшитиб, биз ҳам дарров лабимизни бур-  
дик: «Бе, Ялангтўш қаёқда-ю, бу майдада сўз  
чол қаёқда!»

Ана, бугун ҳам Миркарим бува супасида  
савлат тўкиб ўтирибди. Эгнида ўша қишин-  
ёзин кўкси очиқ оқ яктак. Боядан бери мени  
ер остидан разм солиб кузатяпти шекилли.

Хиёл ҳадиксираб, портфелни чап қўлга ол-  
дим-да, секин яқинлашдим:

—Ассалому алайкум, бува.

Чол аста бошини кўтариб қаради.

— Ваалайкум.

Энди йўлимга кетаверсам бўлади, лекин  
Миркарим бува билан кўришмасдан ўтиш  
учун отнинг калласидай юрак керак. Ҳол-аҳ-  
вол сўраган бўлиб бир нималар дея минғил-  
ладим, аммо унинг синчков нигоҳи бошимдан  
оёғимгача таъқиб қилаётганини кўргач, да-  
мим ичимга тушиб кетди.

—Ҳм, қайтдингми?—деди чол салмоқ би-  
лан.—Ҳа, тузук-тузук. Ўқиш қалай, ўқиш?

—Шукур худога...—дедим унга яхши кўри-  
ниш учун. Секин йўрғалаб қолишга уриндим.

—Шошма,—чолнинг паст, ҳорғин товуши  
жойимга михлаб қўйди. — Бу...сочингни олди-  
риб юрсанг бўлмайдими?

«Бошлांди!» — дедим ўзимча.

— Сочим ўсмаган-ку...—бувага мунғайиб термиламан.

— Гапирма-е! Жамалак бўлиб елкангга тушибди-ю! Одам деган бундоқ сал турқ-тароватига қараб юради-да! Ё, шу...

У мени койишга тушиб кетди. Тавба, бу замонда одамга кўйлагининг кири оғирлик қиласди-ю, бу чолники нимаси энди? Аммо фиқ этмайман. Негаки, Миркарим бува юрт устида юрган одам. Дадам шунаقا деганлар.

— Чаккангдаги гажагингни қара!.. Худди Мулла Маҳаматнинг келинига ўхшайсан-а...

Ўзимни тутолмай кулиб юбордим. Чунки Мулла Маҳаматнинг келини азага бориб: «Йиғласам кўзимнинг сурмаси кетиб қолади», деган олифта бир жувон. Қишлоқнинг олди таннози. Агар бакенбардларим шу сатангнинг гажагига ўхшаса...

— Менга қара, нега бошингга дўппи киймайсан? А? Ор қиласанми? Ўзбекнинг боласимисан, ахир? Ия, чакишниям ўрганибсан-да? Ҳалитдан-а? Ё Тошкентда юриб шунаقا таълим оляпсанми?

— Дўппини куёв бўлганимда киярман, ота, — деб илжайишга уриндим. Бироқ Миркарим бува тишининг оқини ҳам кўрсатмайди, бароқ қошлари остидаги кичик кўзлари у ёғимдан-бу ёғимга ўтиб кетгудек, тик қадалиб турaverди.

— Бундоқ одам бўлиб тўйга аралашмасанг! Маъракага юрмасанг! Қанақа йигитсан ўзи! Ман сани одам бўлгин, дейман. Қойисам, шунинг учун койийман. Хў, ҳали қуюлиб қолганингда эслаб юрарсан, Миркарим бувам шунақайди, деб...

Ҳар сафар нутқининг шу қисми мени жуда эзиб юборади: тишимни тишимга қўйиб зўрға чидадим.

«Миямни қўлимга қоқиб бериб, энди ялпизлашини! Қув-да, бу чол...»

—Йўғ-э, нимага хафа бўлар эканман. Майли-майли, айтганларингизнинг ҳаммасини қиласман...

Шу сингари сўзларни вагони билан қаторлаштириб, ундан узоқлашдим-да, елкамдан тоғ ағдарилгандек, енгил нафас олдим.

Миркарим буванинг фарзанди йўқ. Жиянининг бир қиз, бир ўғлини боқиб олган.

«Тўзим берсин ўшаларнинг бардошига,— деб ўйлайман йўлда кетатуриб. — Бечоралар, роса адабини берса керак...»

Кечқурун кўчага отландим. Дарвозадан чиқаётib, бирдан юрагим увишди. Дўппи киймабман—тағин Миркарим бува чиқиб қолса-я? Секин изимга қайтдим. Кечаси соат бирда қайтиб келиб ухлашга ётдиму, қани уйқу келса! Чолнинг гаплари энди таъсир қила бошлиди. Жуда қизиқ одатлари бор-да ўзи.

Бир кун адвокат қўшнимиз Солижоновнинг қизи Умида булоқقا, сувга кетаётган экан. Қаёқдандир лоп этиб Миркарим бува чиқиб қолибди. Умиданинг чиройликкина кўйлаги чолнинг кўзига бир тутам бўлиб кўринибдими, «Ҳув, турқинг қурсин!» деганча олдига солиб роса қувлабди. Бечора қиз чеганини даранглатиб кўча ўртасига ташлаганча бизникига қочиб кирди. Ўшанда чолнинг тили тиззасига тушгудек бўлиб юрганини кўрганимда, кўзимдан ёш чиққунча кулган эдим.

«Фарзанди йўқ, bemexr, гапираверади-да»,

—дея ўзимга ўзим тасалли бериб кўзим илинди.

Шаҳарга қайтишда дўппи кийиб кетдим. Шанба куни ё дўппи эсдан чиқади, ё... Хуллас, Миркарим бува яна бир айб топади-да, яна ҳаммаси бошдан бошланади. Аммо чолнинг бир тантлигига қойилман: ҳеч вақт одамнинг орқасидан гапирмайди—нима гапи бўлса, шартта юзингга айтади-қўяди.

...Қишлоқ гузарида автобусдан тушгач, сумкадан дўппини олиб кийдим, бармоғимдаги узукни чўнтакка бекитдим — энди Миркарим бува тугул, ундан каттасидан ҳам қўрқмайман!

Чолнинг дарвозаси олдида уймалашган одамлар кўринарди. Оҳ-ҳо, Миркарим бувам тўй-пўй бошлаворган шекилли. Яқинлашиб қарасам, ҳамма бел боғлаган, ичкарида йифисиги товуши... Юрагим ёмон бир нарсани сезган каби оёғимдан мадор қочди.

—Ким?—овозим ўзимга базўр эшитилди.

—Миркарим бува...

Тахта бўлиб қолдим. Аввалги шанба соппа-соғ эди-ку?! Гарангсиб бирпас қаққайиб турдим. Нима қилиш керак? Ўйга борай-чи...

Ойим уришиб бердилар:

—Тўғри ўтиб келавердингми?.. Ҳозир мозорга опчиқишиди, бирга борсанг бўлмайдими? Уятмасми, кўздай жойда туриб? Фотиҳа лозим... Ёш бола эмассан-ку!

—Мен қаёқдан билай...

—Билма, ишқилиб, сира билмай қолгинда! Қуруқ сўппайиб ўсавермай, мундоқ урфодатниям билгин-да!

Яна Миркарим буваникига қайтиб бордим. Тобутни олиб чиқиб кетишибди. Ёним-

даги киши юзига фотиҳа тортаётib, пицирлади:

—Гўри тўла нур бўлсин...

...Бу гапларга ҳам энди анча бўлиб қолди. Мана, ўқишини битирдим, ишляяпман. Миркарим бува айтганидек, «қуюлиб» қолганман. Студентликдаги олифтагарчиликлар қаёқда, ишим кўп—ҳафтада бир ойнага қарашга қўл тегса-тегади, бўлмаса—йўқ. Ҳозир жуда сипо тортиб қолганман. Юртнинг тўй-азасию, ҳашар-ҳушарига баравар аралashiб юрибман. Шаҳарда ўқиётган укамнинг юриш-туришига баъзан ғашим келади. Индамайман. Гоҳ-гоҳ Миркарим бувани эслаб қўяман. «Миркарим буванинг фарзанди йўқ», деган гап ёлғон экан. Унинг қарчигайдек Ҳасан-Ҳусан ўғли бир кунда фронтга отланиб, кичиги мини тўққиз юз қирқ учинчи йил қаҳратонида, каттаси эса ўша йилнинг саратонида ҳалок бўлган экан...

Ўша пайтда, биз ёшлар назарида Миркарим буванинг энг катта қусури—кексалик гуноҳи бўлиб туюлган нарсанинг аслида нима эканлигини мен энди англаб етдим: чол лоқайд эмас экан...

## НОМУС

—Ба-а! Ба-а-а! Ум-ба-ба!..

Чўғи ўчиб қолган муздек танчада ёнбошлигаган кўйи пинакка кетган чувак юз, малла ранг соқол-мўйлови анчадан бери кузалмаган ушоққина чол чўчиб кўзини очди. Бирпас гангигб ўтиргач, ҳовучини қулоғининг орқасига қўйиб, молхона тарафга аланглади.

—Ба-а! Ба-а-а! Ум-ба-а-а!..

Молхона тўридаги ёғоч қўрада уч-тўртта ориқ қўй оламни бузиб, бир-бирига гал бермай маърарди.

«Жониворлар оч ётибди-да,—дея ўйлади чол,—бу йил шўрликлар ҳам қийналиб кетди. Қишдан ўлай-ўлай деб чиқди-ю, ҳали оғзи кўкка теккани йўғ-а...»

У ўзича норизо ғудунглаб, подачи Холтой чўтири ни сўкди: «Аҳмоқ, бу тилсиз жониворларнинг уволи тутмайдими? Юртнинг берганига қаноат қилиб, боқавермайсанми подангни? Ҳе, нафсингга ўт тушмай кет! Бора-бора подачи ҳам арзанда бўлади шекилли. Мана, бир ҳафтадан буён пода чиқмайди. Аксига олиб, уйда на бир кафт ем, на бир боғ хашак қолган...»

—Ба-а! Ум-ба-а! Ба-а-а!!!

Бу чинқириқ чолнинг қулоқларига гўё

мих бўлиб санчилар эди. У атрофга бетоқат кўз югуртириб, ҳассасини қидирди. Ҳовлида ҳеч ким йўқ. Неваралари ҳам ўйнаб кўчага кетганми, бирортаси кўринмайди.

Чол ўтирган кўйи сирғала-сирғала танчадан чиқди (ўнг оёғининг тиззадан пасти йўқ эди), шу алфозда, ҳафсаласизлик билан наридан-бери кўкка бўялган қўпол эшикка қараб секин-секин сургала бошлади. Қўйлар, худди молхона томини кўчириб юборишга қасд қилган каби бараварига маърашарди.

Ошхона этагидаги ҳужрачанинг эшиги фийқиллаб очилди-да, узун ҳаворанг кўйлагининг енглари тирсагигача шимарилган, қўллари хамир юқи, пакана, қора бир хотин айвонга чиқиб келди.

—Суннат! Ҳув Суннат! — деб қичқирди аёл қамиш бўғоти нурай бошлаган пастак пахса деворга яқинлашиб. Бирор жавоб эшитилмагач, ўзича гувраниб, кўчага чиқди.

Чол айвоннинг хомсувоқ деворига суяб қўйилган қўлтиқтаёғи билан ҳассасига таяниб, қаддини ростлади, сарпойчан чап оёғига калишини топиб илди. Битта-битта босиб, цемент зинадан тушаётганида ўн яшар нимжонгина невараси Фаттоҳ йиртиқ кеди кўтариб, ранг-қути ўчганча ҳовлига кириб келди. Унинг орқасидан фифони фалакка чиқиб, вайсаб-саннаётган онасининг сурони эшитилди:

—Ҳув, ўйин жонингни олсин, газанда! Бу ёқда шунча иш турибди-ю, сен думингни тутқазмайсан-а, яшшамагур! Қани унинг, қай гўрга гумдон бўлди тағин?

Фаттоҳ қўрқа-писа минғиллади:

—Мактабга кетиб қолди-ку, волейбол кўргани.

—Ху, кетмай балога йўлиқсин! Ҳали келар шўтга, бурнидан булоқ қилиб чиқармасам, шошмай тур! Бугун алапга бориш ҳам йўқ бўлдими энди?! Нима ейди бу зормандалар? Бор, томни қара, сочилган-почилган хашак бўлса супуриб туш...

Бола лабини буриб, тумшайди:

—Мактабда КВН бўлади-ку ҳозир...

—Хув, ўша кивининг ордона қолсин! Ер ютгур, ўлдирдиларинг-ку одамни! «Қивин» деб биттанг кет, «контоктепар» деб биттанг кет! Бу ёқда онанг шалтоққа қоришиб ётаверсин! Бор, анави овозинг ўчгурларга бир бало сол! Бор, деяпман санга!

Бола энди йифламсиради.

—Ўқитувчи уришади...

—Э, ўлиб кетмайдими уришмаса! Бор, қара деяпман, қулоқ-мияни тешворди-ку! Бу тирикчилик ўлгур битта манга керак экан-да? Агар жуда шу Акромхўжанинг қизига байлаб берган бўлса ҳам! Зап чўрини топиб олгансан ҳамманг!..

Фаттоҳ жойидан жилмади-ю, бирдан айю-ҳаннос солди:

—Ув-в... Бор-мий-ма-а-ан!.. Опамиз уришади-и...

Онаси унинг қулоғидан чўзди:

—Сан жувонмарг кимга гап қайтаряпсан? А? Кимдан ўргандинг буни, бўйнинг узилгур? Қани, бундоқ тургин, ҳу, балога йўлиқ! Мана санга, мана санга!..

У хамир юқи қўли билан ўғлининг юзига аямай шарт-шурт шапалоқ тортди. Бола додлади. Чол ҳайҳайлаб келиб, неварасини ажратиб олди. Келини ҳамон разабдан пишқи-рар эди;

—Бор бўлсанг тузук бўлгин, итвачча, бўлмаса биратўла йўқ бўлиб қўя қолгин, ҳадеб жонимга ўт қўявермай!

Унинг ола-кула кўзлари, гезарган лабларининг пириллаб учишини кўриб, гўё бирор шишини сууриб олаётгандек, чолнинг аъзойи бадани зирқираб кетди.

—Қўй, болам,—деди у паст, ялинчоқ товушда,—азонлаб норастанинг дилини сиёҳ қилма—ёмон бўлади.

Хотиннинг бурун катаклари керилиб, туксиз қошларининг ўртасида нўхатдай тугун пайдо бўлди.

—Э, сиз орага тушманг!—деди қўлини пахса қилиб. Авзойидан қайнатасини уриб юборгудек важоҳати бор эди.—Боламгаям гапиролмайманми энди? Манави очофатларга бир бало бўлса, ўғлингиз сизга индамайди, ҳамма заҳрини манга сочади, билдингизми?!

Аёл шартта бурилиб, ҳужрачага жўнаркан, чол унинг: «Жонимдан ҳам тўйдим, ўлсин мунақа тирикчилик, муштдайидан тошдайигача хўжайин, кошки қўлидан бир тийинлик иш келса...» деб тўнфиллаб кетаётганини эшилди-ю, лабини тишлади. Келини боядан бери қоронғи уйга қараб отаётган тошлар, ниҳоят, мўлжалга теккан эди. «Бу қандай хўрлик! Ҳалитдан шунақа бўлса... Худо кўрсатмасину, эрта бир кун бошим ёстиққа тегиб, шифтга боқиб қолсам, оғзимга бир томчи сув томизадиган одам ҳам топилмас экан-да?!»

Чол пиқиллаб йиғлаётган неварасини алдаб-сулдаб овутди-да, мактабга чиқариб юборди. Келинининг бояги гаплари миясида ҳамон заҳарли илонга ўхшаб ғимиirlар эди. Беихтиёр бадани қизиб, молхонага қараб сур-

галди. Қўйлар уни кўра қўра тўсиғига сапчиб баттар маърашга тушди. Омонатгина ҳахта полда чўзилиб ётган малла говмуш бошини кўтариб мунгли инграпиб қўйди. Дув этиб пашша тўзиди. Девор тагидаги бурчакда шалпанг қулоқларини осилтириб турган қари эшак кўзлари ялтираб ҳиқиллади. Чол, турибтуриб, молларига ачиниб кетди: «Кечадан бери тупроқ ялаб ётибди-я! Суннат даладан бир боғ-ярим боғ ўт келтириб турган эди, бугун у ҳам йўқ».

Тўсатдан чолнинг хаёлига ғалати фикр келди: далага ўзи борса-чи? Нима, ўлибдими, бирор боғлам ўт топиб келар, ахир? Ҳадеб, еб-ичиб, узун кекириб ётаверган билан иш битармиди? Зора, келинининг жафи, ўзининг қулоғи сал тинса... Бўлди, боради. Таваккал. Жуда бўлмаса, эшаги оёгининг чигилини ёзиб келади-ку.

Чол ғайрати қўзиб уйга кирди, бултур бошлатган бир пой маҳсисини кийиб чиқди. Охурда нишхўрд хас-чўпларга кўмилиб ётган эгар-тўқимни топиб, эшагини эгарлагунча қўйларнинг бақириғидан қулоғи том битиб қолаёзди. Нарвонга илиб қўйилган ўроқни олиб, эгар устидаги эски чопон тагига қистириди-да, эшакни етаклади.

Нон ясаб ўтирган келини ҳужра дарчасидан унинг қорасини кўриб ҳайрон бўлди, сўнг ўзича тусмоллади: суғориб келса керак...

Чол дарвозадан чиққач, эшакни етаклаб келиб баланд кулранг тош ёнига тақади. Бир қўли билан эгарга, иккинчиси билан эшакнинг бўйнига тирмашиб, амаллаб миниб олди-ю, қўлтиқтаёқ ва ҳассаси ерда қолиб кетди. Нима қиласини билмай, ҳардамхаёл гарангсиб

турган эди, муюлишдан темир ғилдирак ғилдиратиб, зувиллаганча бир қора бола ўтиб қолди. Чол қичқирди:

— Ҳув, Собирнинг ўғлимисан, баққа ке, манави ҳассамни олиб бер!

Орадан чорак соатлар ўтгач, баҳор қуёши қиздира бошлаган сертупроқ йўлда орқасидан енгил чанг булутини эргаштириб эшак текис йўрғалар, чол эса яғринини офтобга тутиб, мол боқиб, тўп тепиб юрган болаларнинг қий-чувига, оламни тириклик, яшариш нағмаларига тўлдирган қушларнинг мулойим вижир-вижирига қулоқ солганча хаёл суриб борар эди.

Одам кексайгандан кейин ёш болага ўхшаб қолар эканми, мана шу йилдан бошлаб, сал нарсани ҳам кўнгилга оладиган «тегманозик»ка айланди-қолди. Сўнгги пайтларда жанжал-можарога сира тоб-тоқати йўқ, келинини кўрганда юраги терак баргидек титрайди. Омон бўлгур келинининг жаҳли ҳам доим қош билан қовоқ ўртасида. Аслида, у бечорада ҳам айб йўқ. Қўлидаги шу қизчаси туғилгач, бир ёмон дардга чалиниб, салга жиззифаги чиқиб кетадиган бўлиб қолди. Ҳали ёшлиги бор-да, бу шаштидан тушиб ҳам қолар...

Одамзод ўзи шу: бир умр бирордан озор кўриб, бирорга озор бериб, эртасига бутунлай эсингдан чиқариб юборасан. Гўё алланимадан қуруқ қолаётгандек, шоша-пиша, ҳеч нарсага парво қилмай, вақтни сомондек совуриб яшайсан. Босган қадамини қайтиб олишни мутлақо истамайдиган қайсар ҳўқизга ўхшаб, киприкдаги сўгалдек кўзингга туртиб турган хатоларингни ҳам тан олгинг келмайди. Кейин, бир пайт, бундоқ эс-ҳушингни жамлаб,

орқа-ўнгингни сал йиғиштиргач, дунёга тузукроқ назар солиб: яшаш нимаю қадр-қиммат нима, одам-одамгарчилик нима—энди англаб етадиган бўлганингда тўсатдан лоп этиб ўлиб қоласан...

Чол кафтини пешанасига қўйиб, олдинга тикилди: кун ёйилиб кетибди. У эшагини қистади.

Йўл ошиб ўтган тепаликнинг пастида одамлар сийрак ғивирлаб юрган боғлар бошлианди. Тош, кесак билан номига девор айлантирилган боғ кўчалар оралаб ўтаркан, чол қиз сочидек тараб қўйилган ток новдаларига, яшнаб ётган олма-ўрникларга кўзи ёниб термилар эди.

Тўсатдан кимдир унинг отини айтиб чақиргандек бўлди. Чол қайрилиб қаради-да, пастак пахса девор оша мўралаб турган, кўк саллали, сийрак соқол, қув башарага кўзи тушди.

—Ия!—деди у киши ялпоқ юзига кулги ёйилиб. Юмуқ ўнг кўзини негадир силаб қўйди.—Ҳа, тақсир, йўл бўлсин?

Чол уни таниди: Нишонхўжа.

—Шундоқ,—деди у дудмал қилиб,—бир айланиб...

—Айланиб денг? Ҳа, тузук. Ўзингиз қалай-сиз, сиҳатларингиз қандоқ энди? Рангингиз анчи тузугу, бурунгидан? Тинчликми, ишқилиб?

Чол ундан қутулиш учун ростига кўчиб қўя қолди:

—Молларнинг ўти қолмабди, шунга...

—Нима?!—соғ кўзининг пахтаси чиқиб кетаёзган Нишонхўжа деворга тирсаклаб олди.

—Ўтга кетяпман, дейсизми? Қанақа қилиб опкеласиз? Э, уриниб қоладиган бўпсиз-да,

биродар, чакки бу ишингиз, қайтинг ҳалиям, —у лабини ачинганинамо ялаб, бош чайқади. —Ўзингиз ҳам ҳеч тинмадингиз-тинмадингизда! Бу дунёнинг иши ўлганда битади. Тирикчилик—тирикчилик дегандай... Лекин энди сизга уят, биродар, ҳа, уят. Ўзингиз яримжон бўлсангиз. Ахир, бундан буёқ оғиз билан иш битирадиган пайтингиз. Ташлаб қўйинг болачага, керак бўлса қилиб олсин. Нима, сиз билан биз бу дунёни гўрга олиб кетармидик?

Чол тинимсиз шанғиллаётган Нишонхўжадан қутулиш учун гапни қисқа қилди:

—Энди... ўғил-қиз ҳам ўз йўлига экан, мулла Нишон, қани, хих!

—Э, ана шунаقا папалаб худо урдирворгансиз-да, болаларни! Мўнча жуда! Болачангиз мармартош қўярмиди? Ўлганингизда: «Вой, отам», деб бир-икки соат йифласа йифлар, йифламаса йўқ, ўзингизни ўйласангиз-чи! Ў, айтгандек, қани тушинг, чой қилиб берай?

Чол унинг гапига қулоқ солиб ўтиrmай, эшагини халачўп билан ниқтади. Эшак қулоғини чимириб, ёлғизоёқ йўлдан лўкиллаб кетди.

Чол Нишонхўжани ошкора ёмон кўрар, буни яшириб ўтиrmас эди. Одамнинг бир кўнгли қолмасин экан. Бўлмаса, иккови деярли тенгқур, оталари ҳам қадимдан боғ қўшни эди. Бир майизни тенг бўлиб ейдиган қиёматли оғайнини бўлмасалар-да, ҳар қалай, иккаласи ҳам шу кўчаларда тупроққа қорилиб, узум ўғирлаб, чуғурчиқ қўриб катта бўлишган, қирқ иккинчи йил кузагида, ноябрнинг заҳар томиб турган қора совуқ тонгида бричка аравага тушиб, фронтга ҳам бирга жўнашган эди.

Минг қилса ҳам уруш ўз оти билан урушда! Унинг ваҳшатига кўникунча бирга чўчиб, бирга қўрқиб юришди. Кўкрагида шернинг юраги бўлганида ҳам, инсон боласи барибир хавф-хатар қошида мудом ҳадиксирайди. Валломати ҳам дунёга икки марта келмайди-ку, ҳаммага ҳам жон ширин. Ўлим ёмон, аммо ундан ҳам ўлиш ёмон. Лекин бир бошга бир ўлимни тан олиб қўйиш—марднинг иши. Шундай пайтда юртнинг корига ярамаган одамнинг хоҳтиригию, хоҳ ўлиги...

Нишонхўжа ана шунаقا имоннин ютган ҳезалак чиқиб қолди. Бир кечада барчанинг оғзига оҳак сурниб, панд берниб кетди: Олматада эрта-индин фронтга жўнашга шайланишаётган эди. Бир куни саҳарда Нишонхўжани кўриб, капалаги учиб кетди: иккала кўзининг жияклари ағдарилган, авра-астари қип-қизил қонталаш!..

Тушдан кейин ҳарбий комиссия Нишонхўжани хизматга яроқсиз топиб, уйига қайтариб юбориш ҳақида буйруқ чиқарди. Хайрлаша туриб Нишонхўжа сирини секин ошкор қилди: қаёқдандир уч-тўртта қалампир топиб, тун бўйи кўзини ишқалаб чиқсан экан.

Дунёда маккор, устомон одамнинг хили кўп, аммо у салкам ўттизга кириб, ҳали бунақасини кўрмаган эди—ҳайратдан донг қотди. «Туф бетингга!» деди ичида. Овоз чиқариб айтмади. Ўша пайтларда айттолмас ҳам эди. Кейинчалик ўзбек ҳамюрлари: «Қани оғайнингиз?» дея сўраб-суринтирганиларида: «Ўлди»,—деб қўя қолди.

Дарҳақиқат, Нишонхўжа энди шу кундан эътиборан унинг учун ўлган эди...

Қирқ йил қирғиннинг ичидә юриб ҳам ажали етмаса одам ўлмас экан. Умри узоқ эканми, туз-насиба тортибми, бир оёқда бўлса ҳамки, қайтиб келди. Қайтиб келиб қараса—ўша-ўша Нишонхўжа; гузарда ўнг кўзини исқирик қийик билан танғиб, носвой сотиб ўтирибди. Ҳар кимнинг нияти—йўлдоши: қалампир қил томирларини куйдирив юборган экан, бир кўзи оқиб тушиб, кўр бўлиб қолибди. Бу гапни эшитиб ҳам, негадир, кўнглида бирор нима қилт этганини сезмади.

Ҳаёт ўз фарзандларини: «Сен гуноҳкорсану, сен фариштасан», деб ажратиб ўтирамай, барчага баб-баравар ризқ-рўз улашаверар экан. Мана, бугун Нишонхўжанинг ишлари жойида. Эрталаб мол бозорда, тушгача намат бозорда даллоллик қилиб, «ҳожат чиқаради». Олди-соттисини тамомлагач, кечқурунлари маҷитга чиқиб, мўмин-мусулмонлар билан охират ишларидан сўзлашиб ўтиради. Жума кунлари ўғлига олиб берган ялтироқ машинасида шаҳарга тушиб, Хости Имомда намоз ўқиб қайтади. Мундоқ бир мард йўқки, чиқиб: «Ҳой, сен ўзинг нима эдингу сени ўқиган намозинг нима бўлар эди?!» деса!

Илонизи сўқмоқ йўл адирни ёнбошлаб, нишабликка қараб оға бошлади. Эшак тўсатдан оёқ остида ётган чойнакдай япасқи қизғиши тошга қоқилди-да, мункиб кетди. Чол дарров гавдасини орқага ташлаб, икки қўллаб эгар қошига ёпишди. У ташвиш тўла нигоҳи билан олдинга, кимсасиз далага тикилди. Қайтишда яна бояги «Мулойим супурги»нинг боғи олдидан ўтиш керак. Бу ўша—ўзи билган Нишонхўжа бўлса, ҳойнаҳой, ҳали томошасини куриб: ~~«Ула, бу~~ кунингдан», де-

йиш учуноқ йўлини пойлаб ўтиrsa керак. Иш-қилиб, дўст-душманга шарманда қилмасинда...

Чол яна Холтой чўтирни эслаб ич-ичидан ранжиди: «Юки енгил эшак ётағон бўлади», деб бурунгилар хўп топиб айтган экан-да. Тайёр юз эллик сўм ойлиги, тагида булутдек оти билан ҳам пода ҳайдаш малол кеп қопти. Ҳай, майли, яхшиликка кўринсину, одамлар кўрган кунини унутиб, ношукур бўлиб кетяптида... Бўлмаса, вақтида шу Холтой подачилар ҳам туюнинг кўзицек битта куюк кулчага юзини қора қилиб, қишин-ёзин яланг оёқ, ким кўринганинг молини боқиб, даладан бери келмас эди...»

Эшак кўм-кўк майсалар орасида қовжираб ётган бултурги янтоқларни босиб-янчганча бир тегирмон сув айқириб оқаётган тўқай ёқалаб, тик сўқмоқдан пастга туша бошлади. Чол тўхташга қарор қилиб, жиловни тортди. Қалта думига дарҳол аллақаердан чакамуғ ёпишириб олган эшак ютоқиб ўзини ўтга урди.

Этаги яккам-дуккам, сийрак буталар шумшайиб ўсган пастқамликдаги жарга бориб туташувчи сойнинг ёнбошида бош тортиб қолган жавдар, бурчоқ, ёввойи беда, ёвшан қулф уриб ётарди.

«Бу йил далада ўт яхши битибди,—теваракка кўз солиб, хурсанд ўйлади чол.—Ҳавасга ўрсанг бўлади-я...»

Боя эшакка миниши ҳам ҳолва экан—қўлтиқтаёгини ерга тираб, эгардан тушгунича майиб оёғигина эмас, соғига ҳам зирқираб оғриқ кирди. Ўзининг қайсараглиги ҳам хийла бор-да. Шу пайтгача бир ҳафсала қидиб лоа-

қал ўша протез қуриб кеткурни қўйдириб олмади-я! Сал дармон бўларди-ку...

Чол дастаси лиқиллаб қолган эски ўроғини қунт билан қайради, оёғини узатиб ўтириб олди-да, секин ўришга тушди. Бўлиқ, барра ўт, «шир-шир» тушаётган енгил, қиличдек ўроқ унинг баҳри дилини очиб юборди. Пойида ҳали тонгги шудрингини тўкиб улгурмаган ўт-ўлан, гиёҳ-кўкатларнинг ҳавода гуркираган бир оз тахир, ўтқир ҳидидан нафаси энтикиб, вужуди анчадан бўён унутилган оромбахш бир ҳузурдан яйраб кетди.

Ёшлигига қандоқ ўради-я!

У маҳалларда ҳали ўзи ёш, билагида кучи, белида қуввати бор экан—ҳафталаб кечани-кеча, кундузни-кундуз демай чалғи тортганида ҳам на бир чарчаганини билар, на тир кчиликнинг оғирлигидан зорланар эди.

Бўзанжарнинг нариги тарафидаги даштда колхознинг катта пичанзори бўларди. Ердан қор кетиб, баҳори буғдой қаричга келиб қолганида қишлоқдаги қимирлаган жоннинг ҳаммаси пичан ўримига кўчиб чиқар эди. Тоғ баҳори капалак умридек қисқа, елдек келиб, селдек ўтади: бир ҳафта кечиккан одам бир йил хашаксиз қолиб кетаверади.

Кўкси очиқ яктак кийған, якка кифт йигит-ялаинг қулочини кериб ҳавас билан чалғи ташлайди, новдадек ёш-ёш ўспиринлар гарам соясида жавдардан боғлиқ тугишиади, кечки салқинни пойлаб қишлоқдан чиққан чоллар кигиз қалпоқни пешанага бостириб, ойдинда гимирсиган кўйи қўл ўроқ билан пичан боғлайди. Иккита шохни бир-бирига суюб, омонат ясалган чайлладаги хуржуннинг иккала кўзида қўшқулоқ мўндиilar серқатик, хуш

таъм жўхори гўжага тўла. Қақраган томоқни ҳўллаб олиш учун бир кўтарасану битта хурмачани роҳатланиб қандоқ бўшатиб қўйганингни билмай қоласан...

Чол, оғзининг суви келиб, беихтиёр жилмайди. Хаёл қурсин, бирпастда одамни қайдан қайга олиб кетмайди-я!

У машаққат билан олдинга сурилди. Ростдан ҳам қариб қолибди шекилли, тўрт лаппа ўт ўргунча қора терга ботиб кетди. Ҳассаси билан қушқўнмас тиканни босиб қирқди-да, четга улоқтирди, сўнг яна ўришга тутинди. Тер томчилари тинимсиз ачиштираётган юзкўзига дон чиқариб қолган жавдар бошоқлари шарт-шурт урилиб баттар азоб берар, гуленинг қипиқлари энгагига, жиққа ҳўл кўкрагига ёпишиб, ғашини келтирас экди.

Қуёш тиккага кўтарилганча муаллақ қотди. Ўт-ўлан орасидан кўтарилаётган ҳовур кўзни тиндириб жимиirlар, чигирткалар қулоқни тешиб юборгудек жон ҳолатда чириллар экди.

Чолнинг тили қуруқшаб, танглайига ёпишиб қолди. Қани энди бир пиёлагина сув бўлса! Пастда шарқираб ариқ оқиб ётиби-ю, ундан ичиб бўлмайди-да: сув чўчқахонадан айланиб келади. Ўзи ҳам ё эрта эмас, ё кеч эмас, қоқ қизиқ туш пайтида келиби-да.

Ўтириб ўриш жуда ноқулай экди. Ҳадеб олдинга энкаяверганидан чолнинг кўкрагида оғриқ турди. Ҳафсала билан қиртишлаб, чўкиртак тиканларни бирма-бир териб ўтиргани учун иши секин унмоқда экди. Майли, ҳечқиси йўқ, кўпи кетиб ози қолди. Яна беш-олти боғ ўрса бас... Аслида нариги бетга ўтса бўлар экан. У ёқда ўт ҳам қалин, бирорта ше-

рикми, ё дала қоровулими учраб қоларди. Қарашиб юборармиди...

Чол афсус билан бош чайқади-да, ўзининг хаёлидан кулгиси қистади. Шу жазирамада қайси бир миясини еб қўйган одам дўзах бўлиб ётган тўқайга келарди?

У нафасини ростлаб орқасига қаради, эгар ёнига боғланган қозоқи жун арқонга кўзи тушиб, бирдан юрагида ваҳима турди: қандоқ ортади?!

Чол бу нарсани ҳали ўйламаган экан, тўсатдан эслаб оёқ-қўли бўшашиб кетди. Шунча ўтни ўриб, уюб ташлабди-ю, ортиш-чи?

Жавдираф атрофга аланглади: ҳеч зоғ йўқ. Сароб ҳалқалари жимир-жимир титраб ётган бийдай далада ёлғиз чигирткалар зорланиб чириллайди. Ҳатто қари эшак ҳам мўр-малаҳдай ёпишган хира пашшаларни ҳайдашга эриниб, бошини осилтирган кўйи тошдай қотган. Чол анча вақт хаёли тариқдек сочилиб, шу алфозда паришон ўтириди. Ниҳоят, сал ҳушини тўплаб, ўзига далда берди: қани, аввал йиғиб-боғлаб олсин-чи...

Шу фикр юрагига қувват бўлиб, шоша-пеша ўрган ўтларини боялашга киришди. Бояларни ерга ёзиб, ўрнидан қўзғалди-ю, оғриқ зўридан иҳраб юборди; бели тарашадек қотиб қолган эди. Ўнг қули билан хийла вақтгача умуртқасини уқалаб ўтириди, оғриқ бир оз босилгач, яна сургалиб, бояларни бир жойга йиға бошлади.

Қуёш ҳануз аёвсиз олов пуркар, кўйлак-иштони, оқ сурп яктаги тердан жиққа ивиб, баданига ёпишиб кетган эди.

Чол ўтни боғлаётганида айниқса қийналиб

кетди. Бое ихчам чиқиши учун ўнг тиззасининг кўзи билан сиқиши керак, у эса эвини қилолмай, ҳаккалаб сакрарди. Назарида, ўтириб боғлаш маъқулдек туюлди. Аммо ерга ўтирганида ўт уюми баландлашиб кетди-да, боғлиқнинг нариги учини топгунича хуноби чиқди. Боғлиқни бор кучи билан тортди, лекин боғ ҳамон беўхшов ҳурпайганича қолаверди. Чол боғлиқ тушиб кетмасин, деб бир учини тишлаб олди, бутун кучини тўплаб, иккала тирсаги билан ўтнинг устидан босди. Бўйин томирлари ўқлоғидек бўртиб, юзига қон тепди. Тер, қичитқи ўт тегиб ачиштирган билаклари, тирсакларининг кўзи туз сепгандек ловиллай бошлади.

Биринчи боғни боғлаб бўлга, унга елкасини тираб, аста тин олди. Ҳорғинликдан бармоқлари билинар-билинмас титради.

Хаҳ, ўтиб кетган ёшлиг-а! Бир умр қимматини билмаган нарсангнинг қадри шундай пайтда билинар экан-да!

Чол хўрсишиб, жиққа ҳўл оқ чит рўмоли билан бўйни, пешанасини артди. Яна ишга киришди. Иккинчи боғни, негадир унчалик қииналмай, осонгина боғлади.

Аллақаёқдан адашиб келиб қолган гармсел тўқай ичиди бирпас гангиди юргач, сўнг қайгадир ғойиб бўлди. Чол боғларнинг тагидан арқон ўтқазиб, бир-бирига маҳкам таниди, кейин ўтириб тағин дам олди. Ташналиқ юрагини чўғ каби куйдирар эди. У қақроқ лабларини қимтиганча бирор кимса келиб қолармикан, деган умидда бўйни чўзиб, баҳайбат, темир симёғоч қаққайган тепалик эта-гидаги йўлга термилди. Ҳув нариги бетда, Шувар устидаги адир ортида кўздан йўқола-

диган катта йўлда, машина ўтиб кетган шекилли, элас-элас чанг оқариб кўринади.

У кўзини юмди, қорни қулдиради. Шунда ўзининг қаттиқ толиққанини, кўнгли беҳузур бўлаётганини пайқади. Эшагини етаклаб, пастга тушаркан, ёнбошдаги катта-катта икки боғ ўтга қараб, дили ёришди: мана, ҳали шунча ишга қодир экан-ку! Худо хоҳласа, ҳозир амаллаб ортиб ҳам олади; кейин эшагини диконглатиб уйга жўнайди; Нишонхўжанинг боғи олдидан ўтаётгандা атай! «Ассалому алайкум!» дейди. Бир эсхонаси чиқиб кетсин!..

Чол эшагининг айилини тортди, юкнинг ёнига яқин тақаб тўхтатди.

—Иш-ш...—деди эшакнинг бўйнига шапатилаб,—бирпас тек тур, жонивор.

Ўзи эса танғиб қўйилган ўтга разм ташлаб, хавотир аралаш ўйлади: «Кучим келармикан?»

У қўлтиқтаёфини ерга маҳкамроқ тираб, гавдасини олдинга эгди, юкни секин қимирлатиб кўрди. Ўҳ-ҳу, тегирмон тошидек зилзамбил-ку. Ишқилиб, эшак юриб кетмаса бўлгани...

У бир боғни иккинчисининг устига кўтариб қўйди, гавдаси яна ҳам пастга букилиб, қўлинини жун арқон орасидан ўтказди, кейин:

— Е пирим! — дея орқага шартта силтандида, юкни ердан даст узиб, эгарни мўлжаллаб ташлади. Оёфи, қўлтиғининг таги зирқираб, кўзидан ўт чиқиб кетди-ю, шу лаҳзанинг ўзида бир четга учиб тушди.

Ўзини ўнглаб, тепага қаради. Қаради-ю, аламидан «дод» деб юбораёзди: лаънати эшак

юриб кетган экан—иккала боғ ҳам айқаш-үй-қаш бўлиб, тўрт қадамча пастда, сув ўпқини ҳосил қилган чуқурда думалаб ётарди!

Чол пешанасидаги терни сидириб, чакка томирларининг гурс-гурс лорсиллашига қулоқ солганча, хомуш ўтириб қолди. Бели, умуртқаси қақшаб оғрир, юз-кўзи, қўллари ловиллаб ёнар эди. Немашаққат билан ўрган эди-я...

Нишонхўжанинг кулгидан тиржайган ялпоқ башараси унинг кўз ўнгида жонланди. Чол титраб кетди. Қариган чогида...

Йўқ, у бунчалик анои эмас. Ҳали ўзининг кимлигини ўша Нишонхўжага ҳам, бошқаларга ҳам кўрсатиб қўяди! Номус кучли, жони шу ерда узилиб кетса узилиб кетадики, барibir ортади!

Чолнинг қайсарлиги тутди. У табиатан ҳалимдай юмшоқ, беозор, аммо жаҳли чиққан кезларда тутганини кесадиган, «кўр ўжар»га айланар эди.

Яна юқорига сургалди. Эшакнинг оёғи тагида ётган қўлтиқтаёқни олиб, унинг бош-кўзи аралаш бир-икки солди:

—Итвачча! Ҳароми! Итдан тарқалган!—У бутун аламини эшакдан олмоқчи каби қизариб-бўзарганча бақираради. Сал ҳовуридан тушгач ўтга суюниб, бир оз дамрон тўплаган бўлди. Чакамуғ, девона пайтава, эски янтоқ қоплаган чуқурдан боғларни битта-битта судраб чиққунча ҳалқуми қуруқшаб, кўз ўнги қорайиб кетди. Бирдан қулоқлари шангиллаб, мадорсиз ўтириб қолди, кейин яна эшакни пастга етаклади.

—Жим тур, падар лаънат, нақ қимирласанг ўласан!—Кўзларини олайтириб, пўписа

қилди у. Эшак эса парвойи фалак, бир пишириб, думини ликиллатиб қўйди.

Бу сафар шошмади, юкни азод кўтарганча эгарни мўлжалга оларкан, худди чўкаётган одам талвасада фарёд солгандек:

—Иш... иш... иш... дейман, иш, ҳароми, иш! —дея тинимсиз бақираради. Аммо эшак эшаклигини қилди—юриб кетди. Чол жон аччиғида бир қадам олға ташлади, қўлтиқтаёқ ерга қулади. Шунда ўнг биқинида ногаҳоний оғриқ сезди. Назарида, кимнингдир кўринмас қўли қовурғалари остига ўткир бир тиғни санчиб-суқиб олмоқда эди. Бор мадорини тўпладию, юкни эшак устига улоқтирди...

Бу гал оппоқ гуллаб ётган ковул устига чалқанча йиқилди. Кафтлари, кураклари зирапчага тўлиб ачишаётганини пайқаса-да, тишини тишига босди. Кўзини очиб қарашга қўрқар эди. Ниҳоят, тескари ўтирган кўйи ёнига разм солди: эшак анча нарида ўт чимдидб юрар, боғлиғи узилиб, арқондан чиқиб кетган ўт ер билан битта сочилиб ётар эди.

Негадир, энди чолнинг на эшагидан жаҳли чиқди, на қўрқув босди, аксинча, қалбини совуқ бир хотиржамлик ҳисси буткул қамради, ўзини гўё туйқусдан уйғониб кетгандек ҳис этди-да, вужудига ўжар, айни пайтда мардона бир туйғу ҳоким бўлиб олганини, энди унинг измидан чиқиш асло мумкин эмаслигини теран англади. Шундан кейин дилида алланечук бардамлик сезди, шилиниб кетган оёққўлларининг зирқираши ҳам босилгандек туюлди. Ён-верига кўз югуртириб, ҳассасини қидирди.

Кун пешиндан оққан, қуёшнинг забти па-

сайган эди. Туя ўркачига ўхшаш суйри адирлар этагига тўшалган соялар тобора узая бошлади.

Чол ҳамон сургалиб юрар, сочилган ўтларни сабр-тоқат билан бир жойга йифар, боғлар ва ўзини, худди шу ишларни қилмаса, қолган беш кунлик умрида муҳим бир нарса этишмайдигандек ҳис қиласр эди.

Қош қорайиб, ҳорғин қуёш уфқнинг бағрини доғлаганча бепоён замину бўйсунмас одамларга маъюс термилган кўйи ботиб бораркан, тишлари маҳкам қисилган, ўзи сингари қадимий даласида ҳануз куйманиб юрган жонсарак бир чолга қараб бош чайқади.

...Тўртинчи бор, ниҳоят, унинг омади келди. Эшак жойидан жилишга улгурмай, тўсатдан устидан қандайдир оғир, ҳўл юк таппа босиб тушди-да, кўзларини ҳам бекитиб қўйди. Эшак гандираклаб, оёқлари чалишиб кетди.

—Ортдим-ку! Барибир ортдим-ку! Ахир ортдим-ку! — Чол қўлларини беўхшов саланглатганча кимсасиз, қувдай далани бошига кўтариб, шодон қичқираради.

Сўнг қалт-қалт титраб, оёғидан мадор қочди-ю, ўзини юзтубан ерга ташлади. Ди-моғида туяётган ўт-ўланларнинг гуркираган иси ва ғалаба нашъасидан маст бўлиб, бағрини намхуш тупроққа бериб ётаркан, энди Нижонхўжанинг боғи олдидан бошини баланд кўтариб ўтажагини, кўзларидан тирқираб оқаётган ёш томчиларини ҳеч ким кўрмаслигини ўйлаб, еру кўкка сифмас эди...

## ЧАЙЛАДАГИ ТҮРТ ЭРҚАҚ

Улар икки ҳафтадан буён яйдоқ Яйилма далаларида картошка кавлашарди.

Кечқурун ҳаво очиқ эди, ётиб қолишга қарор қилдилар.

Ер чўкиб, тарс-тарс ёрилиб кетган тақир дўнгликда пастак қамиш чайла омонат қўнқайтирилган. Тепасига брезент тортилган чайла ёнида ўчоқ; тезак уюми, дастаси синиқ кетмон, эгар-тўқим, жағи йиртиқ бир пой этик, солярка тўлдирилган вино шишалари, нўшпиеz, тарвуз пўчоқлари сочилиб ётибди. Қозон устидаги қофоз қопнинг бир учи куйган, қорни пачоқ оқ бидон оғзига қурум босган қопқора човгум тўнкариб қўйилган.

Чайлдан сариқ қалами шим кийган калласи катта, пакана, ғўлабир йигит коса кўтариб ташқарига чиқди. Ивирсиб ўчоққа ўт қалади-да, челак олиб пастга—Хонариққа тушиб кетди.

Ҳўл тезак тутай-тутай қизигач, гуриллаб ёнди.

Қош қорайди. Кун ботарда бир муддат чўғдай яллиғланган шафақ аста-секин сўнди. Оловнинг югурик қизғиши тиллари атрофга сапчиб, лип-лип соя ташлай бошлади. Бирпас-

да қоронғилик чўккан дўнглик этагидаги картошказордан кимдир хириллаб бақирди:

—Хў, Тўлавой! Бугун пишадими?!

Учоқ тепасига энгашганча «жаз-биз» қилаётган йигит капирни қозон устига кўндаланг қўйиб қичқирди:

—Келинглар-ов! «Картопелний пуйре» гатоп!

Картошкаси ковланиб, шудгор очилиб қолган пайкалдан олдинма-кейин судралиб учта кўланка ўчоқ бошига чиқиб келди. Гавдаси тиқмачоқдек, чўяндай қоп-қора Наби салмоқланиб қадам ташлар, ўртада қоп орқалаган Студент, энг орқада қўлларини белига қўйган кўйи ерга энгашганча дароз қаддини букиб Асом бува келар эди.

—Ҳорманглар энди!—деди Тўлавой тутундан ачишган кўзларини ишқалаб.

—Саломат... Уҳ...—Асом бува бора солиб, эгарга ўтирди-да, қамиш деворга суюнди.—Қизталоқ иш чарчатди-ёв одамни.

Студент қопни чайлага қўйиб чиққаچ, шоша-пиша кўк паҳталигини ечди, атрофдагиларнинг ҳай-ҳайлашига қарамай, бидондан бир чўмич сув олиб ичди.

—Қафф! Қафф! Қафф!..

Уттиз одим чамаси нари тепаликдаги бе-сўнақай қаққайган темир симёғочда қатор тизилган уч-тўрт қарға бир-бирига гал бермай қафилларди.

—Хў, миянг қайнамай ўл!—дея ўшқирди Наби ўша тарафга хўмрайиб.

Асом бува ташвишланиб осмонга тикилди:

—Ҳавога тағин булут чиқибди. Яна бир балони бошламаса гўрга эди...

—Ва-а, онасини эмсин, бу йил карчикани

кавлолмай қор тагида қолиб кетарканмиз-да,  
—деди Тўлавой бурнини тортиб.—Парво қил-  
манг, Асом бува, шўтда қишлиймиз қўямиз.  
Кўкламда қазиб олармиз.

—Бу йил қийғиракдан аввал куз тушди, а,  
Асом бува?—Наби бидон устига оғир чўқди.

Асом бува оғзидағи носни туфлаб, мужмал  
жавоб қилди:

—Худойимдан ҳам айланай... Жа қаҳрига  
олворди-ку. Кунора ёмғир-а, э, тавба! Муна-  
қада тирикчилик бўладими?

—Пахтани айтинг, пахтани!—Тўлавой қо-  
зоннинг қопқоғини ёпиб, ўрнидан турди.—Бу  
йил планиям тўлдиролмас экан.

Индамай сигарет чекиб ўтирган Студент  
танглайнини такиллатиб, сўз қотди:

—Пахта бўлади-ю, терилмай қолармиди?

—Бажара олармикан-а?—деб сўради На-  
би унинг оғзига тикилиб.—Бу... тинмай ёға-  
версаям-а?

—Ҳа, техникани нима деяпсиз?

—Ҳм, техника эмиш... Шудгорнинг атала-  
си чиқиб ётибди-ю. Қани, «зангари кеманг»  
жойидан қўзғалсин-чи!

—Нима бўпти? Одам қайси техникадан  
кам?

—Тоза бошларинг оғримаган-да,—Асом  
буванинг тажанглиги тутди. — Оғир-енгили  
санларга тушдими? Экканлар терволар бир  
бало қилиб. Карчикангни ўйласаларинг-чи...  
Кўкламда бу ҳожим раисга айтдим: «Ҳой,  
Миртолиб халтанинг ўғли, бу ер халқоб, бўл-  
майди карчикага», дедим. Қаёқда!

—Ўрда-қирда, дедим. Қаёқда!

бу йил,—дея салмоқлаб хулоса чиқарди Тў-  
лавой.—Қани, киринглар, овқатни сузаман.

Наби ичкарига кирди-да, қоронфида тимирс-  
киланиб бурчакдаги ўнинчи чироқни топиб  
ёқди. Чайланинг ичи гира-шира ёришди. Тўр-  
га йифилган ўрин-кўрпа устидаги чойшабда  
тепага осилган халта-хулталарнинг сояси пай-  
до бўлди. Пойгакда, идиш-товоқ қалашган  
бурчакда керосинка милтиллар, унинг заиф  
шуъласида қамиш деворнинг шох-шаббалари  
орасига қистириб қўйилган уч-тўртта мофор-  
лаган нон, пичноқ, газета парчаси оқариб кўри-  
нар эди.

—Вой, жоним-эй!—Асом бува доғ босган,  
ислиқи намат четига ўтириб уҳ тортди.—Чар-  
чабман.

Чой дамлаётган Студент унга ачиниш би-  
лан тикилди.

—Саттор акам келган экан-ку, бир-икки  
кун қарашворгин, демабсиз-да?—деди у секин.

Саттор—Асом буванинг ягона фарзанди.  
Мотоцикл билан бир болани босиб кетиб, ик-  
ки йилга ҳукм қилинган, аллақаерда жазо  
муддатини ўтамоқда эди.

Наби узала тушиб ёнбошлаганча нон кав-  
шаб илжайди:

—Бе, Сатторга иш десанг, лабига учук то-  
шади-ку... Ишга териси юпқароқми, а, Асом  
бува?

Чолнинг чўзинчоқ, сарғиши юзи қизариб,  
кўк кўзлари чақчайди:

—Сатторқул бизни куйдирворди-ку... Якка  
ўғил, кўнглига қараб... Ичкиликни орқасида...  
Мана, сан юрибсан-ку азбаройи додангни қий-  
маганингдан,—деб Студентга юзланди у.—Бу  
хомқайиш, иккитанинг отаси-ю, одамга тариқ-  
ча ачинмайди... Майли, ишқилиб, омон бўлсин.

Жимлик чўқди. Чайланинг тепасида нимадир шитирлади.

—Ҳали ёш-да, эси кириб қолар,—дея ўзи-ча юпатди Наби.

—Ўзи шу: бой боласи ўн бешида бош бўллади, камбағалнинг ўғли ўттиздаям ёш бўла-ди.—Асом бува сўкина-сўкина этигини ечди.—Қани, ҳей, чойингдан қуй.

Катта сопол лаганда буғи чиқиб турган картошка қовурдоқ кўтариб Тўлавой кирди.

—Боплаб ташладим, «картопелни пуйре»-ни. Қани энди, бунга яримта бўлса!—деди у кўзлари қисилиб.

—Оҳ-оҳ...—Наби оғзининг таноби қочиб иршайди.

Ҳазил-ҳузул билан овқатлана бошладилар.

—Ашулани қўйсаларинг-чи,—деб қолди бир пайт Наби.

Студент ўрнидан турди-да, бурчакка суюб қўйилган қоп устидаги кичкина транзистор-нинг қулоғини буради. Қитир-қитир товуш чи-қараётган тембр тўлқинлари орасидан аёл кишининг паст овози эшитилди:

«...ўтар кечаси Исроил қўшинлари яна Иордания чегарасига ҳужум қилдилар... Кучли артиллерия отишмаси оқибатида...»

Лагандан қўл тортиб, диққат билан қулоқ солиб турган Асом бува ғижиниб бош чай-қади.

—Тавба, хунасаларни урушдан бошқа дарди касали йўқми, а? Одамлар буғдой экиб, пахта экиб, дехқончилик қилса, бу қизталоқларнинг дехқончилиги урушми, дейман-да!

—Э, нима деяпсиз, Асом бува, булар ўликнинг ёғини сотиб пул топади, ҳа! Одамнинг соддаси сиз билан биз, юрибмиз-да кет-

монга лақиллаб...—дея гапини маъқуллади Тўлавой оғзини тўлдириб.

Асом бува қўлини кир сочиққа артиб, чой ҳўплади:

—Дунёдаям юрт кўп экан-да. Ҳар отлари борки, айтаман десанг тилинг қавариб кетади. Ёрданио дейдими-ей, Қўйтикан дейдими-ей...

Студент кулиб юбормаслик учун лабини маҳкам қимтиди: «Қўйтикан... Ватикан дегани шекилли».

—Бу... ўшалар ҳам ўзимизнинг Заркат, Сўқоққа ўхшаган жойлар бўлса керак,—дея кипригини пирпиратиб, тусмоллади Наби.

—Буям районми, областми, бир нарса-да, а, Мирсобит?—деб Студентга юзланди Тўлавой.—Бизга қарайдими?

—Йўқ,—дея бош чайқади Мирсобит ички бир надомат билан.

—Ха, емайсанми?—деб сўради Наби унинг қўл артаётганини кўриб.—Э, олсанг-чи.

—Тўйдим. Биласиз-ку, биз пулга овқатланавериб, чимхўр бўлиб қолганмиз, ҳэ-ҳэ...

—Қил ичак экансиз, Мирсобит, емадингиз-ку?—деди Тўлавой кавшанганди.—Жа, устудентларга қийин экан-а, ҳаммасиям шунаقا нон емасми?

—Ўқиши осонми санга?—уҳ торти Асом бува.—Бечора устудентлар юраверар экан-да ранги сарғайиб...

Мирсобитнинг ғаши келди:

—Сиз айтган студентларнинг даври ўтиб кетган. Ҳозиргилар дўпписи тушиб кетса, пул бериб олдиради.

«Энди дилрабо қўшиқлар, ёқимли куйлар тинглаб дам олинг, азиз дўстлар», деб эълон қилди диктор.

—Хозир «кўрпача»ни беради, мана кўрасизлар!—деди кўзларини ўйнатиб комил ишонч билан Тўлавой.

Икки-уч дақиқадан сўнг чийилдоқ аёл овози бетайин нақоратда айлана бошлади: «Солдик кўрпача... кўрпача... кўрпача!..»

Ҳамма кулиб юборди.

—Биз ҳам салкам авлиё!—Тўлавой сохта ғуурланиб, бошини кўтарди.

—Буларниям топган дастмояси нуқул ашула экан-да!—Асом бува қалампир чайнаган каби афтини бужмайтириди.

—Нима бало, Асом бува, нервинниймисиз?

—Буни эшитаверсанг сан ҳам нервинний бўп қоласан. Қизталоқлар, ҳатто об-ҳавони рост айтмайди-ю!..

Чол қўл силтаб, инқиллаганча ўрнидан турди-да, таҳорат олгани ташқарига чиқди. Тўлавой эринибгина идиш-товоқни йифиштиришга тушди.

—Қани, ётамизми?—деб сўради Наби тиш ковларкан.

—Дарров-а?—Мирсобит қошини норози чимирди.—Ҳали эрта. Ошқозон касал шундан-да.

Наби сап-сариқ тишларини кўрсатганча оғзини катта очиб эснади:

—Одам чарчади-ку,—деди,—ҳа... сан тошканлик...

Мирсобит индамай илжайди.

У кўнгли эриб, беихтиёр Тошкентни, неон чироқлар шуъласига чўмилган хаёлкаш хиёбонларни, институтнинг бегам кулги тўлдирган нимқоронги йўлакларини... эслади ва Дијоромни соғинганини, уни жудаям кўргиси келаётганини ҳис этди.

«Дилором мени шу аҳволда учратса...—деб ўйлади у уст-бошига назар солиб.—Танирмикан? Жуда қизиф-а... У, дунёниг алла-қаерида бир умр шундай тирикчилик қиласди-ган одамлар борлигини ҳатто тасаввур ҳам этолмаса керак».

У ташқарига чиқди, муздек ҳаводан энти-киб-энтикиб симириди. Қора совуқ тушган, изифирин изиллайди. Юлдузларни ютиб юбор-ган осмон қоп-қора.

Асом бува елкасига чопон ташлаб пастдан чиқиб келаркан, алланарсага қоқилиб кетди-да, тўнғиллаб сўкинди: «Э, онангни...»

Чайлага киргач, чол феъли айниб яна минғиллади:

—Хаҳ, ўзбекнинг кўрган куни қурсин! Эшакдай ишлаб-ишлаб дунёни тўплайди-да, қай гўрдаги бало-баттарларга совуради. Уй соламан, тўй қиласман... ишқилиб, ўлгунча талваса-да...

—Жаҳонда зап яшашни биладиган одамлар бор,—деди Наби музлаб ётган кўрпа қатига шўнғиб.—У, биз-да, ўзи... Ҳозир бирорвага юз сўм берсанг ҳам шу ерда ухламас!

Чироқни ўчиришди. Анчадан кейин Асом бува:

—Хў, Тўлавой! Халадўлник бўп кетди-ку капа ўлгур,—деб тағин ғингшиди,—ҳеч оёғим исимаяпти. Анави эшикни ўрнига бир нарса тутсанг-чи...

—Нима тутаман?

Ён-атрофдан ғувиллаб совуқ киради. Тўлавой пайпаслаб, бир бурчакдан увада шолча парчасини топди-да, эшик ўрнига тутаркан:

—Чимилдиқлар муборак!—дея ҳиринглаб кулди.

Чайланинг ичи барибир исимади—тўрт томондан ғўриллаб совуқ урарди.

—Қотиб қоламизми, нима бало?—Асом бува ўрнидан туриб ўтирди. —Падарига лаънат...

—Жуда қизиқсиз-эй, Асом бува,—Наби пиҳиллаб гап қўшди,—сизга нима азоб ўзи, агаратга келиб? Ётмайсизми, қоринни си-лаб...

—Ҳа, ётасан-а, ётасан... Иккита нонни бироров берадими, а? Ишламай бўпсан!

—Ишдан одам ўлмаган.

—Тўғри, лекин... Тирикчилик. Келмасанг—яна бўлмайди. Ўзингдан қолар гап йўқ: Саторқулни уйлантирганимда уч минг қарз бўлганман, икки минги ҳали шундоқ турибди. Дам ол, деб айтишга осон. Бошингга тушмагунча гапираверасан-да!

Чол жавраб-жавраб, ниҳоят, жим қолди...

Эрталаб Тўлавой «чимилдиқ»нинг бир четини кўтариб ташқарига қаради-да, кўзини ишқалаб:

—Вой-бў! Му-у-у-з!—деб юборди.

Мирсобит кўрпадан бош чиқариб, секин мўраладиу дилдираб кетди: ҳаммаёқ қор.

«Оlam ям-яшил!» — деб ўйлади у қачонлардир ўқиган бир ҳикоянинг номини эслаб.

Асом бува жойнамоз устида ўтиради.

—Иш ўлди,—деди ёнига қайрилиб,—карчика музлаб қолади энди. Кечаги ўттиз қопни бекор қоплаган эканмиз-да...

—Вай, онангни, ҳаво очиқ эди-ку...—Тўлавой дир-дир титраб кийина бошлади.

—Ман кечаси эшикка чиққанимда қор энди мушук изи бўлган эди,—чол ўрнидан қўзғалди.—Аzonга томон ёғибди-да.

Кейин пишиллаб ухлаб ётган Набининг елкасига туртиб:

— Эй, Карим афандининг невараси, турмайсанми? — деди. — Худди додангга ўхшайсан-а!

— Додаси нима қилган? — дея сўради Мирсобит қизиқсиниб.

— Э, додаси жуда бир содда, ювошқочагон одам бўлган. Карим афанди лақаби... Бир замонда бозорга карчика обориб сотган экан. Сотибди-да, ўттиз килоаси қолганда ўтмабди. Қопдаги карчикани устига пулни солиб уйга жунабди. Йўлда бирор: «Сотасанми? деса: «Сотаман», дебди. «Қанча?» «Ҳа, фалон пул». «Ма, фалон пул. Қопингният берада қол?» деса, «Ҳа, олавер!» дебди. Шунаقا қилиб, карчикадан ҳам, пулдан ҳам айрилган экан.

Мирсобит яйраб кулди: «О, одамнинг анойиси!»

— Турларинг, ҳув баллар, «картопелний пуйренг» кўнгилни оздириб юборди,—деди Асом бува ташқарига чиқаркан. — Чой-пой қайнатинглар амаллаб.

Изгирин аралаш шитирлатиб ёғаётган қуруқ қор юз-кўзга игнадек санчилади. Кartoшказор ўртасида тахлаб қўйилган қоплар қорайиб кўринади. Қора қаргалар чарх уриб, шодон қағиллайди. Чайла олдиради совуқ қақшатиб кетган икки-уч туп маккажўхорининг ялангоч пояси эгилиб қолган.

Асом бува кавушига қор тўлиб, ичкарига қайтиб кирди.

Чойдан кейин чол «кетаман»га тушди.

— Энди уч кунсиз бир иш бўлмайди,—деди этигини кияркан. — Кетдик. Чайлани бўри емайди,

—Карчика-чи?

—Нима қиласди карчикага? Тураг...

—Яхлаб қолади, Асом бува,—пиёладаги чойга нон түғраётган Тўлавой ялт этиб унга қаради.—Бирор иложини қилиш керак.

Нима қиласдик? Ё машина, ё трактор топилмаса... Бўлгандаям ҳозир шудгорга кириш ўлимдан қийин. Бу боқибекам бригадирдан ҳам дарак йўқ.

—Кўрпаларни обориб ёпсак-чи?—Жонсарак бўлиб қолған Студент ҳаммага бир-бир тикилди.

Наби бош чайқади:

—Таги зах, бўлмайди. Чайлага олиб чиқиб, устини ёпсак—хайр...

—Ўйлаб гапиряпсанми?—деб тўнфиллади Асом бува олайиб.—Бир километрдан опчиқиб бўладими? Ичагинг узилиб кетар!

—Бир иложини топиш керак-ку, ахир!—Тўлавойнинг ҳам тажанглиги тутди.

—Э, ўт тушиб кетмайдими манга деса колхознинг карчикасига!—дэя ўшқирди чол бўғилиб.—Ўламанми энди! Оёғим синиб кетай деяпти, жоним ўзимга керак... Кетмайсанларми? Билганингни қилларинг!..

У шартта ўрнидан турди-да, чопонига ўралиб, чайладан чиқди. Бир оз букчайган, дароз гавдаси оппоқ адирлар ортида хиёл ўтмай ғойиб бўлди.

—Номард, уволни ўйламайди!..—Тўлавой жиғибийрони чиқиб, чолни сўкди. — Бизнинг жонимиз темирми?

Хийла тортишув, маслаҳатлардан сўнг, қопларни чайлага олиб чиқишига келишдилар.

Оғзига палак қўйиб тикилган катта сариқ қопни биринчи бўлиб Наби орқалади. Тўла-

вой билан Мирсобит инқиллашиб аранг ёлка-  
сига қўйган қопни озод кўтариб, бамайлихо-  
тирип лапанглаганча тепаликка чиқа бош-  
лади.

—Жуда бақувват экан-ку, — деди Мир-  
собит ҳавас билан.

—Э, хирси безанжир бу,—деди Тўлавой  
ҳансираб.—Қани...

«Чайлагача уч юз одим. Қопнинг оғирлиги  
юз килограмм. Қолларнинг сони ўттизта. Уч  
юзга юз—баробар тўрт юз,—деб ўйлади Сту-  
дент.—Оддий арифметика...»

Дастлаб ишнинг оғирлиги билинмади.  
Аммо учинчи гал...

Наби ва Тўлавой муттасил шу хил ишлар-  
ни бажаравериб пишиб кетишган, пишқир-  
ганча сир бермай қатнашар эди. Мирсобит  
бирпасда қора терга тушди. Чайлага ўттиз  
одимча қолганда тиззалари қалтирас, оёғини  
базўр судраб ташлаган қадами орқага қараб  
кетаётгандек туюлар, сирпанчиқ, ола-чалпоқ  
ер кўз ўнгидаги гир-гир айланар эди.

Бешинчи қоп унинг тинкасини қуритди.  
Оёғи тойиб, мункиб кетди-да, чап қўлига та-  
янганча аранг қаддини ростлади. Нафаси бў-  
ғилиб, кўз ўнгини кўкимтирип ҳалқалар қопла-  
ди. Сўнгра бор кучини тўплаб силкинди, қал-  
тираб, икки қадам олға силжиди.

Тепадан тушиб келаётган Наби иршайиб  
кулди:

—Тирикчилик, бола-чақа боқиш ана шу-  
нақа оғир, Студент...

Жони ҳалқумида лиқиллаб турган Сту-  
дентнинг фифони чиқди, тишлирини ғижирла-  
тиб қисди.

У сариқ қоплар қалашиб ётган хирмонга

имиллаганча яқинлашаркан, ҳар битта қоп кўзига бало-қазодай кўринарди. Кейин ичичидан уҳ тортиб, елкасини яна юкка тутарди.

«Яшаш учун кураш баъзан шу қадар машиққатли бўлиб кетадики, бу талвасанинг номи ҳаёт эканига мутлақо ишонгинг келмайди», дея ўзича хаёлга берилди у ва шу заҳоти: «Шу пайтда фалсафага бало борми?!»— деб ўйлади энсаси қотиб.

Тушдан кейин қор тинди. Изгирин кучайди. Учиб-қўниб қағиллаб юрган қарғаларнинг қораси ўчди.

Қолларни чайлага жойлагач, устини ўраб-чирмаб, «чимилдиқ»ни тутиб қўйишиди. Бир бурдадан суви қочган нон кавшаб, Хонариқ бўйига жимгина йўл олдилар. Мирсобит бўйини қисиб борар, гардани муздек қотган, оёғи ачишган сайин бунга ўзининг ғаши келарди.

Катта йўл ёқасида депсина-депсина бирпас ўткинчи машина кутишди. Қор кўзни қамаштириб жимиirlайди. Олтита сув наоси ўрнатилган котлован чуқуридан ўқтин-ўқтин тақиллаган товуш эшитилади. Бўй чўзиб қолган яланғоч, нозик терак ниҳолларининг уни кўзга чалинади.

—Шу ерга ким эккан бўлсаям, жа каллали одам экан,—деди Тўлавой.

—Ҳа-а,—деб маъқуллади Наби,—шундоқ сув бўйи, кўм-кўк яшиаб ётса—жаннат бўлиб кетади-да...

Тўлавой унинг гапини эшитмай, ўзича алланарсаларни ҳисоблади:

—Юзтаси бир сўмдан юз сўм, мингта бўлса икки минг сўм, ўҳ-ўҳ!.. Агар сарровга мўл-

жаллаб икки сўмдан сотса... икки минг деган гап. Нақд икки минг-а!..

Қор босган, битта-яримта янтоқ тиккай-ган пастак тепалик ортидан бўғиқ мотор то-вushi эшитилди.

—Машина келяпти,—деди Мирсобит йўта-либ.

Икки дўнг орасидаги муюлишда мошранг «Виллис» пайдо бўлди.

—Раис-ку... Қаёққа кетяптийкин шу ма-ҳалда?

—Шу... районга тушган бўлса, ҳойнаҳой, бирров хабар олиш учун бу ёққа ўтгандир-да...—деди Наби чайналиб.

—Майли, ишқилиб, бизни олиб кетади-ку!

Машина юпқа муз қатламларини қисир-қисир синдирганча икки-уч қадам ўтиб тўхта-ди. Тўлавой секин эшикни очиб салом берди. Эгнида кўк драп пальто, салқи юзи бир оз шишинқираган, барваста гавдали раис лаби-га сигарет қистириб, алик олгандек им қоқди:

—Хўш?

Тўлавойнинг назари даставвал раиснинг оёғидаги топ-тоза, ялтиллаган хром этик учи-га тушди. Сўнгра унинг қора кўзойнагига, бардачок устидаги «ВТ» қутисига бир-бир қаради ва шоша-пиша ўзининг уст-бошига кўз югуртириб, хижолат тортди. Баданидан гу-пиллаб анқиётган ачимсиқ ҳидни раис сезиб қолишидан чўчигандек, беихтиёр бир қадам орқага тисланди, шашти қайтиб, довдиради:

—Шу... карчика шунақа бўлиб... яхлаб қолмасин, деб... ҳалиги... кетмоқчи бўп турув-дик энди...

Раис ўзини суянчиққа ташлаганча ойнага тикилиб қилт этмай ўтиради.

—Энди кима бўлади?—деб сўради томоқ қириб.

—Энди... Занжирли трактор бўлса, олиб чиқамиз шудгордан.

Раис оғир қўзғалиб қўйди.

—Ҳм... Бўлмаса йўқ, денг? Колхозники музлайверсин... Шунақами? Ҳа, бу, шунчалик экан, сал илгари ҳаракат қилиш керак эдида! Ҳаммайиз юрдийиз бозорда, чаккайизга гул тақиб! Энди занжирлик трактор керак деяптилар...

Тўлавой бирдан ранги гезариб, қуруқшаб қолган лабини ялади-да:

—Ҳеч ким ўйнаб юргани йўқ, Нажим ака,—деди секин.—«Вақтлироқ қазайлик», деганимизда ўзинглар рухсат бермагансизлар...

Наби ерга қараб индамай турар, аравага қўшилган от каби оғиз-бурнидан паға-паға ҳовур чиқарди. Студентнинг миясиға гуп этиб қон урди.

«Ҳой, раис!—дека ҳайқирди у. — Сизда инсоф борми?! Бирор ўлай деса, кўмай дейсизми! Қорни бу бечоралар ёғдирибдими? Табиий офат-ку бу!.. Хайф сиздек раҳбарга! Ҳе, ўша...—У раисни қаттиқ силтаб-силтаб ташлади. Раис қизариб-бўзарганча чурқ этолмади...»

Гуриллаган товуш уни ҳушига келтирди. Йигит хаёлий уйдирмасидан ғижиниб, нари кетди.

—Ҳа-а,—дека раис чувак юз шофёрга юзланди,—қани...

Машина чайқалиб ўрнидан қўзғалди. Тўлавой анқайиб, қўлларини шим чўнтағига тиққан кўйи бир оз серрайиб турди.

—Э, тавба!—деди сўнг бўғилиб. Чирт этиб ерга тупурди-да:—Қатта деган ҳам шунақа бўладими?—деб тўнфиллади.

—Бунинг отасини «Миртолиб халфа», дейишар экан,—деди Наби хомуш.—Қеча Асом бува сўкувди, «Миртолиб халтанинг ўғли», деб...

Улар сўкина-сўкина йўлга тушдилар. Шағал ётқизилган қатқалоқ йўл тепаликка ўрлар эди.

## ҲАЁТ ЭРТАГИ

«Азизим Горацио! Дунёда ҳали шундай ишлар борки, кирмагандир тушда ҳам фалсафангизга!»

(Уильям Шекспир)

—Энди-чи, болалар, илонларни қўрамиз! Жим! Шовқинламанглар! Қани, Дилфуз, бу ёққа кел-чи! Чаққон-чаққон! Севар қани? Болалар! Илонлар чўлларда, саҳроларда, сувсиз жойларда асосан судралиб яшайдиганлардан ҳисобланади... Тоҳир, қафасга яқинлашма! Қайт! Ҳой, кимга айтяпман?..

Саратон офтоби аёвсиз қиздиради. Ҳайвонот боғи қора-қура болаларнинг қий-чуви билан тўлган. Қўланса ҳид анқийди. Темир панжаралар атрофини зич қуршаб олган кичкитойлар оғиз-бурнига дастрўмол тутиб гапираётган боғча опаларининг «чўлларда, саҳроларда, сувсиз жойларда асосан судралиб яшайдиганлар» ҳақидаги ҳикоясига мутлақо парво қилишмас, бир-бирларига гал бермай бақириб-чақиришар эди:

—Бу-йи, илонларни!

—Қоч, чақади!

—Жаҳонгирик акам-чи, илондан сира ҳам қўрқмайдилар!

—Хе, ёлғончи! Илондан қўрқмайдиган одам бўларканми?

—Ана, кобра, ана, вуй-й!

—Ма, ма, виш-ш!

—Бу боласи-я, Малика опа?

—Қайси бири?—боғча опа—үн тўққиз яшар, думалоқ қиз Малика сал нарида этюдник қўйиб расм чизаётган баланд бўйли йигитга ўғринча назар ташлади-да, темир лавҳага қараб изоҳ берди:—Бу кобра эмас, анаконда. Африка ўрмонларида яшайди. Айримларининг узунлиги ўн тўрт метргача боради. Ниҳоятда заҳарли бўлиб... Узоқ кетманглар! Қўлингни ол, Тоҳир! Ҳе, қулоқсиз!

«Қулоқсиз» Тоҳир, катта шалпанг қулоқли бола, бошини сарак-сарак қилганча панжарани тақиллатиб, илоннинг ғашига тегмоқчи бўларди.

Рассом йигит қоғоз-қаламини йиғиштириб, болалар ёнига келди. Ингичка, қоп-қора мўйлов ярашган силлиқ мийикларида кинояомуз табассум жилва қиласди.

—Қани, ўша қулоқсиз?—деди у тарбиячига тикилиб.—Қани? Бир қулоғини чўзиб қўяй...

Қиз сабабини ўзи ҳам билмай кулди.

—Булар сизнинг болаларингизми?—расом қўлларини кўксига чалиштириб дарахтга суюнди-да, дунёдан зериккан, ҳорғин кишидек намойишкорона қиёфага кирди.

—Иҳм.

—Ҳаммаси-я? Бир ўзингизникими?

Қиз рўмолчаси билан пешанасидаги томчиларни артиб, тескари қаради:

—Нега унақа дейсиз? Бу... менинг группам.

—Ҳа-а...—йигит, мушкул аҳволда қолгандек, узун бармоқлари билан ясама жиддият қалқиган чўзинчоқ юзини сийпалади.

—Оting нима?—деб сўради у оқ лента таққан пучуқ қиздан.

—Нодира.

—Сеники-чи?

—Пурқат,—деди кўзлари кўм-кўк, йўл-йўл шорти кийган бола.

—Маладес!—деб мақтаб қўйди йигит.— Сен-чи, тилла йигит?

—Манми? Мани отим Алишер,—дея киприкларини пирпиратиб бидирлади гилам дўпили бодом қовоқ болакай.

Рассом оламшумул ғуссага ғарқ бўлган-дек, ошкора ғамгинлик билан бош чайқади:

—Одамларнинг ишига ўлгинг келади,—деб минғиллади у қизга қараб.—Ош ичгани идиши йўқ—итининг оти Маржон!.. Э, тавба...

Тоҳир югуриб келди-да, митти кўзларини йилтиратганча йигитга қизиқсиниб тикилди.

—Амаки, шер зўрми, йўлбарс зўрми?— деб сўради ҳовлиқиб.

Йигит кулимсиради. Боланинг қийшиқ қовундай бошини ҳомийларча силаб:

—Иккаласиям зўр, тойчофим,—деди.

Тоҳир лабларини чўччайтирди:

—Иҳи, жа, биларкансиз! Иккаласиям зўр бўлса, қандай қилиб қафасга солишган?

—Ў, тойчофим! Сенга нима десам экан? Бу... боғча опанг эртак айтиб бермаганми?.. Сираям-а?

—Айтиб берганла...

—Одамлар тўғрисида ҳам айтиб берганми? Йўқми? Тойчоқ йигит, шуни билиб қўйгинки, илонлар, чаёнлар, йўлбарсу тимсоҳлар, ҳатто бегемотлар, анави тулкилар ҳам—одамдан кучсиз! Уқдингми? Энди бориб ўйна, менга халақит берма. Вақт бўлди!..

Йигит кескин бурилди-да, тез-тез юриб кетди. Тарбиячи қиз гап-сўzlари ғалати бу кимса ортидан анграйиб қолди.

Болалар бирданига чувиллаб юборишидӣ. Малика шоша-пиша қафас ёнига яқинлашди. Панжара эшиги тагида уймалашган болалар ҳалқасини ёриб олдинга ўтди. Ўртада пачоқ қора кастрюлька турар, ичида иккита сап-сариқ жўжа тинмай чийиллар эди.

—Ҳой, жўжани ўлдириб тинасизларми? — дея бақирди кўк халат кийган қоқсуяк аёл қафас қулфига калит соларкан.—Болаларингизга қарасангиз-чи, синглим!

Маликанинг юраги шув этиб кетди. Болаларнинг қий-чувини сал тинчитгандек бўлди-да:

—Нима қиляпсиз, опа?—деб сўради товушидаги титроқни ютиб.

—Кўряпсиз-ку, нима қилаётганимни! — ходима хушламайгина жавоб берди. — Ҳайвонларнинг овқатланадиган пайти бўлди. Сиз ҳам ахир қўлингиздагиларни вақтида едириб-ичиравсиз?

Сўнг япалоқ сопол товоққа чеълакдан сув қуяркан:

—Ўлсин, ярим соат кеч қолдим. Зубайдা кўрса, тоза ғалва бўлади... —дея минғиллади.

—Вой!.. Ҳали жўжаларни илонга берасизларми?

Аёл ўзини эшиитмаганга солди. Кастрюлькани ердан кўтариши билан болаларнинг қий-чуви темир панжараларга саҷради:

—Во-а! Илонга ташлар эканлар!

—Вуй-й!..

—Унақа қилма-анг, хола!

—Жўжаларни манга бери-инг!

—Уҳ, ана, оғзини очди! Ана, ана, вуй!

Кичкина Дилдор йифламсираб «боғча опаси»га ёпишди:

—Маликапа-а, қаранг жўжаларни-и...  
уҳм... уҳм...

Тарбиячи қиз, юраги зирқираб, ходимага илтижоли термилди:

—Опа... Бу, гўшт бериб қўя қолсангиз бўлмайдими?

Аёл индамади. Эшик тирқишидан жўжаларни олдинма-кейин қафас ичига ташлади. Чўзилиб ётган анаконда қимир этмади. Жўжалар бир бурчакка қисилиб, аянчли чийиллай бошладилар.

—Хой, хола!—Тоҳир ходиманинг этагидан юлқиб тортди.—Чиқарворинг жўжаларни!

Унинг қоп-қора юзи оқариб, бурун катаклари пириллар эди.

—Хо-о!.. Нега дўқ қиласан!—хола бобиллаб берди-ю, боланинг йиғлагудек бўлиб турганини кўргач, сал ҳовридан тушди.—Ўзи шунаقا-да, болам. Бу дунёда ҳамма нарса бирбирини еб кун кўради,—деб тушунтирди у панжара эшигини қулфларкан.—Агар илон жўжани емаса, эртага ўли-иб қолади, билдингми? Кейин сенга ўхшаган қоракўзларга биз нимани кўрсатамиз?

—Керакмас!—бола лабини чўччайтириб ўшшайди.—Илон керакмас...

—Ие! Ўғил бола ҳам шунаقا бўладими? Ундан кўра, томоша қилгин. Жуда қизиқ: жўжаларни тириклигича... Ҳаппо! Худди тортеганлай...

Аёл кастрюлькани кўтариб нари кетди.

Анаконда ўлжасини сезиб, секин-аста қимирлай бошлади. Малика титрас, болаларнинг қий-чуви қулогига кирмас, илон гўё юрагида ғимирлаётгандек, буткул карахт эди. Тўсатдан елкасига муздек алланарса текка-

нини ҳис қилди-ю, чўчиб орқасига ўгирилди.  
Рассом мўйловини ямлаганча қўлини унинг  
кифтига қўйиб турарди.

Хаёлларнинг янги қуюни  
Банд этибди қизнинг ўйини...—

дея виқор билан ўқиди у. Қиз қош чимирди.  
—Бошландими?—деб сўради йигит.

—Нима бошланади?

—Ҳаёт ва мамот. О, дарвоқе... Илтимос, гў-  
дакларингизни бундан сал нари олиб турсан-  
гиз,—унинг бир зумгина қандайдир ишchan  
оҳангда янграган товуши яна яrim истеҳзоли,  
яrim намойишкорона тус олди.

—Айниқса, менинг тойчоғимни... Биринчидан,  
уларни бу хийла совуқ манзарадан ха-  
лос этасиз, иккинчидан, менга халақит бер-  
масликларини таъминлаган бўласиз.

—Сиз расм чизмоқчимисиз?

—Йўқ, мен эртак чизмоқчиман.

Малика таажжубланиб елка қисди.

—Қани, болалар, юринглар, энди тўтиқуш-  
ларни кўргани борамиз! Акром, Собир, Фат-  
тоҳ!.. Қўйинглар, бунга қараманглар! Қани...

Болаларчуввос солиб, панжараага баттар  
ёпишиб олдилар. Илон ўлжа талвасасида  
оғзини карракдек очиб, ингичка тилини кал-  
диратганча у ёқдан-бу ёқقا бош тебратарди.  
Жўжалар унинг макридан тош қотган кўйи  
бурчакка сиқилиб, қимир этишмасди.

—Опа!—Тоҳир қаердандир калта хивчин  
топиб, югуриб келди.—Илонни ўлдирайлик!  
Мана, мана, ман тош опкеламан!

Қиз томоғига тиқилган алланарсани қулт  
этиб ютди:

—Йўқ, йўқ! Уларга тегиш мумкин эмас!  
Юринглар, яххиси кетамиз.

Боланинг кўзлари катта-катта очилиб кетди.

—Ие! Жўжаларни еб қўяди-ку!.. Болалар,  
тош отинглар, тош!

Қафас ичига нўхатдек, мошдек тошчалар  
ёғила бошлади. Илон безовталаниб, четга  
сапчиди. Шовқин-сурон тобора кучаяр, бирор  
нимани англаш мушкул эди.

—Жим-м! Жим бўлинглар! Тоҳир, бас  
қил!—деб қичқиради Малика. Аммо ўзи ҳаё-  
лан шу тошларнинг бирортаси илоннинг ту-  
хумдек силлиқ, чўзинчоқ бошини мажақла-  
шини бениҳоя истарди. У нажот кутгандек,  
ён-верига аланглади. Лип этиб болалар ора-  
сида рассом пайдо бўлди.

—Тс-с-с!—деди у қўлини кўтариб.—Тўпо-  
лон қилманглар. Бўлмаса ҳаммамизни ҳай-  
даб юборишади. Ўртани сал очиб қўйинглар.  
Баракалла, шундай...

—Йўл беринглар, болалар, амакинглар  
ҳаётнинг расмини чизсин...—бенхтиёр киноя  
қилди қиз.

Йигит ялт этиб унга қаради-да, такаббу-  
рона кулди:

—Ташаккур. Лекин мен, ахборотингиз  
учун, ҳаётнинг расмини эмас, ўзини чизаман.

Уларнинг гапига ҳеч ким эътибор бермас,  
болалар қафасга тикилганча қотиб қолишган,  
нигоҳлар жўжаларни авраб домига тортаёт-  
ган илоннинг узун, совуқ танасига михланган  
эди.

Қий-чувни эшишиб, қаердандир бояги аёл  
етиб келди:

—Қани, ҳой, нари туинглар! Мушайт қил-  
манглар! Боринглар, бошқа жойда ўйнаса-

ларинг-чи!.. Ҳайронман, қанақа болалар экан булар!

У жиги-бийрони чиқиб болаларни тарқатишга уринаркан, Маликадан энсаси қотганини яширмади:

—Синглим, болаларингизга қарамабсиз, шунақа ҳам бўладими?! Илонни безовта қилиб қўйишибди, икки соатсиз тинчимайди энди!

Қиз унинг чағир кўзларига тикилди:

—Опа, шуни бошқа пайт... мумкин эмасми? Ахир, бу болаларга ёмон таъсир қилиши мумкин...

Аёлнинг юпқа лаблари пирпиради:

—Энди томошага келадиганлардан сўраб иш тутамиз, тузукми?—деди у секин, ўйиб оладиган оҳангда.—Эсли-ҳушли қизга ўхшайизу ёш боланинг гапини қиласиз-а! Ҳамма нарсанинг ўз тош-тарозиси бор!

—Энди, опа...

Аёл гал бермади:

—У, сизнинг боғчангизда шунақадир: шўрлик болаларни ҳушингизга келган пайтда овқатлантириб... Худога шукур, бизда тартиб-қоида деган гаплар бор ҳали! Ҳой бола, қоч бу ёққа, нима ташладинг, а?

—Тоҳир-р!

—Худоё тавба! Тўртта болага сўзини ўтказа олмайдиганларга бутун бошли боғчаларни бериб қўйишади! Ҳайронман, сизларни нимага ўқитган ўзи?!—Маликанинг совуққонлиги аёлнинг баттар жаҳлини чиқаарди.

—Оббо, мунча...

—Ҳа, ёқмайдими? Ахир, мана ёзиб қўйибди-ку: ҳайвонларга овқат, у-бу ташлаш таъкиқланган, деб!

Малика ялинди, ёлворди, дўқ-пўписа қи-

либ кўрди, бироқ қафас атрофини қўршаган болаларни жойидан жилдира олмади.

Жўжалар бурчакка қисилишиб чийиллар, анаконда эса тилини калдиратиб, мудҳиш бир қатъият билан уларни ҳануз таъқиб этар эди...

Ниҳоят, Малика болаларни алдаб-сулдаб, нари олиб кетди.

Жажжи столчалар теграсида ўтириб музқаймоқ еяётган болалар орасида Тоҳир кўринмас, «боғча опа»сининг кўзини шамғалат қилиб, фойиб бўлган эди.

Бола қафас ёнига яқинлашганда, рассом скамейкада чекиб ўтиради.

—Амаки,—деди ҳадиксираб.— Жўжаларни... еб қўйдими, а?

Иигит оғзидан кўкиш тутун ҳалқачалари ни чиқариб, унинг елкасидан қучди:

—О, сен бўрини яхши кўрасанми?

—Йўқ,—бала қовоғини солди. — Қуённи. Жўжалар қани, амаки?

—Жўжаларми?—рассом бир зум тин олди.

—Жўжалар... учиб кетди.

—Қанақасига учиб кетади?—деди Тоҳир тумтайиб.—Ҳозиргина бор эди-ку?

—Хоҳлассанг, сенга жўжаларни кўрсата-ман,—деди рассом.—Анави қутичани олгинчи...—у қутичадан бир варақ қалин оқ қофоз чиқарди-да, болага узатди.—Мана, улар.

Тоҳир расмдаги илонни дарров таниди. Бу бояги анаконда, фақат бўйни ҳандалакдек шишиб кетган эди.

—Вуй-й! Бунинг ангинаси оғриғанми, амаки?

— деб сўради у рассомнинг ҳорғин кўзларига тик боқиб.

Йигит жилмайишга уринди, бироқ лаблари бўйсунмади.

—Жўжалар мана шу ерда,—деди у кўрсаткич бармоғини илоннинг томоғига нуқиб.

Бола расмни скамейкага ташлаб ўрнидан турди. У бирданига «амаки»ни ёмон кўриб қолди.

—Сиз нега уни ўлдирмадингиз?—деб сўради у ерга тикилиб.

Рассом туфлисининг учи билан сигарета қолдини эзғиларкан:

—Нега дейсанми?—деди ва хиёл кулимсиради.—Эҳ, гўдагим... Шу расмни сенга бераман, хоҳлайсанми?

Тоҳир бош чайқади:

—Йўқ.

—Олавер, бир куни дунёда сен билан менга боғлиқ бўлмаган ишлар тўлиб-тошиб ётганини тушуниб олишинг учун керак бўлади. Уқдингми?

Бола индамади.

—Мана, тагига ёзиб ҳам бераман, эсадлик,—дэя рассом қинғир-қийшиқ ҳарфлар билан шоша-пиша: «Эртакка ишонгин, тойчоғим!» деб ёзди-да, унга узатди.—Ма. Айтмоқчи, ўқишини биласанми?

Тоҳир бурнини тортиб, танглайнини такиллатди. Сўнгра бош кўтариб, хафақон оҳангда:

—Мен тайёрлов группадаман, ҳарфларни биламан, холос,—дэя мингиллади.

Рассом узун, юмшоқ бармоқлари билан унинг пешонасини силади.

—Хечқиси йўқ, ўргатиб қўйишади. Энди хайд, боғча опанг қидириб юргандир.

Тоҳир орқасига қарамай йўлга тушди.

## **МУНДАРИЖА**

Миркарим чол	3
Номус	9
Чайладаги тўрт эркак	28
Ҳаёт эртаги	44

На узбекском языке

**ХАЙРИДДИН СУЛТАНОВ**

**СОЛНЦЕ СВЕТИТ ВСЕМ**

*Рассказы*

Редактор **Н. Фозилов**

Рассом **Б. Хайбуллин**

Расмлар редактори **А. Кива**

Техн. редактор **М. Исмоилова**

Корректор **Ш. Соатова**

ИБ № 884

Босмахонага берилди 12. 02. 80. Босишига рухсат этилди Р 09139  
Формати 70x90 1|32. Босмахона қоғози № 1. Адабий гарни-  
тура. Юқори босма. Шартли босма л. 2,05 Нашр л. 1,86 Ти-  
ғажи 15000. Заказ № 234. Баҳоси 10 т.

Faфур Fулом номидаги Адабиёт ва санъат нашриёти. Тошкент,  
700129. Навоний кӯчаси, 30.

Ўзбекистон ССР Нашриётлар, полиграфия ва китоб савдоси  
ишлари Давлат комитетининг Бекобод шаҳар босмахонаси.  
Бекобод, 1980.

**Султонов, Хайриддин.**

Қўёш барчага баробар: Ҳикоялар. — Т.: Адабиёт ва санъат нашриёти, 1980. — 56б.

Ер юзида турфа хил одам турфа хил ташвиш билан яшайди. Аммо кўхна ва қадрдан қуёш уларнинг барчасига баб-баробар беминнат нур сочади.

Ёш ёзувчи Хайриддин Султоновнинг ҳикояларида шу ҳақ-да фикр юритилади. Муаллиф замондошларимиз—қишлоқ кишиларининг беором ҳаётини, уларнинг дарду қувончларини тасвирлайди.

Бу инятнинг қай даражада рӯёбга чиққанини баҳолаш эса сизга ҳавола, азиз китобхон.

**Султанов, Хайриддин. Солнце  
светит всем. Рассказы.**

ББК 84У3